

Nouvo

Newsletter of the Seychelles National Party
Vol. 18 Nimer 1 (22 Zanvye 2009)

Vizyon

SNP: Touzour lo ou kote

En lot lannen in komanse. 2009 i prezant li koman en lannen tre difisil pour tou Seselwa. Nou war nou pe fer fas avek en kantite lensertitid. Fanmiy pa tro konnen ki mannyer keksoz pou ete. Travayer pa tro sir si zot pou gard zot lanplwa akoz gouvrenman ek sekter prive pe koup lakantite travayer. Pri lavi i kontinyen ogmante malgre bann promes SPPF. Ki pou arive? Lekel ki pou fer tande lavwa sa pep ki pe soufer? Larepons i en sel: SNP pou kontinyen debout lo ou kote.

En nouvo langazman

Pandan 2009 SNP pe reangaz li koman sa parti politik ki pou anmenn sa sanzman ki neser pour nou pei. Koman en parti lopolizasyon ki serye e senser, nou'n akonpli bokou pandan 2008. SNP in lesel parti ki'n koz san ses lo size pri lavi ki tro o ki pe afekte tou dimoun. Kan SPPF pa apiy lepep Seselwa, se SNP ki'n bezwen debout e met presyon lo gouvrenman. Atraver sa, gouvrenman in bezwen kalkil pli byen e retourn lo serten mezir drastik ki zot ti'n pran. Sel keksoz ki SPPF in kapab fer se enpoz en 'ban' lo tou rali politik zis pou anpes SNP koz laverite avek popilasyon.

SPPF pa'n gard zot promes

Lo lot kote nou'n vwar SPPF enpoz en lanmizer nwar lo nou pei. Zot in devalye rroupi, pous travayer e fer pri tou keksoz monte. Malgre difikilte ki lepep pe fer fas avek, zot bann MNA dan Lasanble Nasyon al restre bosplat dan zot larepons bidze apard maltret Lopolizasyon. Kan en parti i patriotik i merit admet avek kouraz sa ki byen parey ki i vot kont bann move proze de lwa. Seselwa in vremen dezapwente akoz SPPF pa'n gard en sel promes ki i ti fer pandan kanpanny

eleksyon. Zot in vremen anbet lepep, e malerezman zot kontinyen fer li. Kan eski bann MNA SPPF pou ouver zot lizye e olye mazin zis zot lentere, rode ki mannyer pou defann sak fanmiy Seselwa lo nou later?

Pran lentere lepep silvouple

SNP i kont lefe ki gouvrenman pe pran zis en lapros aranz kote finansyel pei parey nou war dan sa bann konferans lapres ki Minister Finans i organize tou le de semenn. Me lo lot kote, pouvwar aste konsomater i kontinyen redwir, sa ki pa travay pa pe ganny louvraz, pri komodite i kontinyen ogmante, e dimoun i kontinyen soufer. Malgre SPPF pe dir ki

program reform i lo target, larestan popilasyon in fini rat zot target personel zistman akoz gouvrenman i pli enterese pou satisfere lobzektif IMF, san pran kont soufrans bann dimoun ordiner. Sa i vremen tris.

SNP i sel lespwar pour Seselwa

Lespwar SNP se pou konstri en Sesel par tou Seselwa e pour tou Seselwa. Sa sanzman i demann ou partisipasyon. Alor nou pe envit ou pou zwenn nou e ansanm annou fer Sesel vin sa pei kot nou tou nou pou partaz dan son prosperite e ansanm nou ava grandi dan laliberte, lazistis ek lape. SNP i ou sel lespwar.

Michel i dir: Mon pa kwar dan Bondye

Seselwa in soke pou antann deklarasyon ki Mr. James Michel, Prezidan Sesel in fer dan en let ki i ti ekri en bankye Lehman Brothers an Lonn. Sa let ki'n tonm dan lanmen Bloomberg Financial News Magazine i ekri ki mannyer Mr. Michel ti fer sa deklarasyon swivan: 'Mon pa kwar dan Bondye, me la aprezan mon konnen ki i ekziste!'

Sa i tre sokan akoz pandan sa bann dernyen lannen Mr. Michel in pran en labitid pou demann Bondye pou beni nou pei alafen tou son diskour. E pourtant sa menm dimoun i deklare ki i pa kwar dan Bondye! Pour nou Seselwa, ki en pep kwayan, sa deklarasyon i menm kapab ganny enterprete koman en revelasyon lo Mr. Michel: I dir en keksoz, me ofet i pa kwar ladan. Parey ki i ti promet pou

met plis larzan dan pos Seselwa e fer lavi vin pli fasil. Ozordi se le kontrer ki nou pe war.

Sa ki osi tris se ki letan zournalis ti kontakte State House pou ganny plis lenformasyon lo sa deklarasyon, Mr. Jean-Paul Adam ti dir ki State House napa komanter pou fer lo sa size. Zot ti prefere anvoy tou pronmen!

Pep Seselwa, en keksoz i kler pour nou ozordi. Nou annan en prezidan ki pa kwar dan Bondye. Sa se pa SNP ki'n dir, me se Mr. Michel limenm ki'n fer sa deklarasyon. I pa drol alor ki sa imsye i kapab zis koman i debarke apre ki i sorti vizit Lepap dir ki i byen ki lapolis in bat bann dirizan lopolizasyon. Tou lezour nou ganny sans konpran akoz nou pei i koumsa. Dirizan i bezwen ganny konverti!

Politik Lakaz = Martir

Depi retour multi-parti, SPPF in servi lakaz koman enn zot pli gran zouti politik. Sa latitud i fer ki ozordi parti SPPF in met bokou fanmiy Seselwa dan en kosmar ki zot pa pe trovou okenn laklerte.

Enn bann pli gran konplent piblik vizavi polisi lakaz gouvènmàn i ki i tro long, tro konplike e tro politize. Avek sa fiasko ekonomik ki SPPF in met nou ladan, keksoz pa pe vin pli fasil pour sa ki ti pe kont bokou lo promes sa gouvènmàn. Ozordi personn pa konnen ki pe arive avek proze Zil Perseverans. Apre ki Jj in promet 5mil lakaz pandan deryen eleksyon, ozordi zot pe sant en lot sanson. Menm si lakaz in pare e ganny servi pandan zwe CJSOI lannen pase, gouvènmàn pe fer sek, olye asiste sa ki dan bezwen!

Bann dimoun ki SPPF ti aste zot vot dan deryen eleksyon avek promes ki PMC ti pou pey zot lokasyon lakaz, san okenn lavertisman an Desannm zot in ganny dir ki botan botan in fini ale.

To lentere pe desot latet sa ki ankor drwa HFC e okenn labank komersyal pa oule renegosye repeyman par lao 15an.

Pri materyo konstriksyon in ariv en pri ekzorbitan e konstriksyon en lakaz, ki en senp rev sak fanmiy in vin en batay ekstraodiner e en kosmar. Antretan lalis espere i kontinyen agrandi dan sak distrik e i annan ki pour plis ki 20an ankor pe esper dan gob.

SNP i kwar ki satisfèr bezwen lozman i responsabilite tou gouvènmàn. SNP i kont e deplor mannyer SPPF i tret lakaz koman en seval politik ki i fwet zis avan en eleksy-

on.

Pandan ki Gouvènmàn pe rode ki i pou fer, SNP i demande ki Gouvènmàn i regard ankor bann logmantasyon dan lentere ki pe tap tou fanmiy e anmenn bokou plis soufrans. In ler pour gouvènmàn mazin en kou sa malere ki pe trimouse pou fer de bout zwenn. Nou osi demande ki Gouvènmàn i fer nouvo negosiasyon afen ki bann dimoun ki'n ganny met deor anba program 'Depar Volonter' i kapab ganny enpe zot larzan avek bann labank ki'n sezi tou. Annou pa oubliye ki sa bann dimoun osi i bezwen manze e fer viv zot fanmiy.

SNP i kontinyen demande ki lakaz pa vin en size politik ki ganny servi par SPPF. Tou imen i bezwen en lozman, alor, nou demann SPPF pou tret dimoun avek dignite ek respe olye zis rod servi zot pou reste o-pouvwar. Apre, silvouple, aret fer bann promes vid e inital avek bi bat latet lepep.

Jj Spirit: en lesey dezespere

Desizyon fondasyon Jj Spirit pou komans donn loan ziska Rs100 mil avek en to lentere zis 0-3%, i en lesey dezespere par Prezidan Michel avek son vis-Prezidan pou aste vot bann zenn.

Dan en moman kot to lentere labank komersyal in desot latet tou dimoun, Jj Spirit pe esey prezant li koman en sover. Me pour kwa an-retour? Byensir, pour bann zenn vann zot vot! Bann tel pratik i danzere pou lavenir nou zenn demokrasi. Ki kalite pei eski Mr. Michel ek SPPF i anvi kree par rod aste vot dimoun? Anplis ki sa, eski i normal pour en Prezidan servi son lorganizasyon pou ed zis en parti popilasyon zenn? Eski i pa sipoze prezidan tou bann zenn Seselwa?

I osi enportan pour sa fondasyon devwale

kote zot ganny sa kantite larzan pou donner koumsa. Sa i enportan pour latransparans e pou dekouraz koripsyon. Sa i en pratik normal dan bokou pei. En dirizan fodre i deklare letan i resevar en gro sonm larzan, pou asire ki i pa pe donn faver person an retour. Vi ki lapey Mr. Michel i mwens ki R50 mil par mwan, fodre ki lepep i konnen kote i pou ganny ziska R100,000 pou donn loan.

Antretan SNP i demann tou zenn pou ouver zot lizeye. Bann faver la pou la pa garanti en bon lavenir. Antretan ki Jj Spirit pe ofer ou Rs100 mil, demann ou lekor si SPPF pe donn ou sa vre loportinite? SNP pe travay pou vwar Sesel antye mars byen e pe fer progre, koumsa ou osi koman en zenn ou ava annan en bon lavenir. SNP pa kwar dan aste vot lazènes. Debut zenn Seselwa!

Lekel lot?

En keksoz i evidan pour tou dimoun ki swiv politik SPPF. Polisi i tre senp: Servi, apre zete. Me dimoun pa tro konpran ki letan SPPF i anmenn ou dan en gro plato, o-fet bann sef pe rod ou pou fer zot travay sal. Napa kalite lavantaz ki ou pa gannyen. Me zour ki ou montre ki ou osi ou annan en lespri e ki ou pa en zouti, sa bann gran sef i pous ou parey en lisyen.

Dan SNP, nou napa larzan pour nou pey dimoun pour nou servi zot. Dimoun ki siport SNP i fer li avek son leker e avek son resours aköz i kwar dan en meyer demen pour son zanf an ek son fanmiy. Napa personn ki kapab ganny servi kot nou. Kan ou siport SNP, ou fer li avek ou leker aköz ou kwar dan son prensip.

Pa les SPPF abiz ou. Zwenn nou ozordi, e ansann annou sanz nou zoli pei Sesel.

PAS PARTOU

Ki deal?

Ki sa investiser etranze dan Nor Mahe i al rode kot en serten Minis apre 6er diswar dan Independence House? Ki sa bann deal ki pas sa ler san prezans travayer? Eski sa pa ouver laport pou koripsyon? La nou menm tande ki sa imsyè pe al en bon deal apre ki in deza ganny plizyer avan. Lepep i annan drwa konnen.

Twincab Pirat?

Zabitan Pointe Larue pe demann Komisyoner Eleksyon pou fer en lanket dan en sitiasyon labi transpor

dan son lofis. Zabitan sa distrik i oule konnen ki sa twin cab nef limero S6826 i fer anba laboutik Tonton touleswar? Nek zot vwar li pe monte desann, pe fer pirate Nageon Estate. Ler lepep pe sere, I annan ki pe kontinyen abize!

Air Seychelles 'Take Away'?

Pri tiket in double, me repa in koupe. Pour breakfast, pasaze i ganny en pti bwat plastik avek en pti dipe, en kwasan ek enpe konfitir. Pour dezenen, ou ganny ankor en bwat plastik avek en pti sandwich ton! Menm travayer Air Seychelles i dezapwente. Aranz sa silvouple!

SNP Lottery

WIN WITH THE SNP !

PRIZES

- 1st : Family holiday : Four return tickets to Mauritius + 7 days accommodation on BB
- 2nd : Two return tickets to Singapore
- 3rd : Two nights HB at La Reserve Hotel, Praslin
- 4th : Two nights BB at L'Archipel Hotel, Praslin
- 5th : SR5000 cash
- 6th : SR5000 cash
- 7th : One washing machine
- 8th : One refrigerator
- 9th : One TV set
- 10th : One DVD player
- 11th : One Guitar
- 12th-20th : Consolation prizes

R10/-

Draw on 1st May 2009